



Nunatsinni aatsitassarsiornermi uranimik aatsitassallu allanik ulorianartunik qingnornertalinnik saniatigut tamakkiisumilluunniit paaasoqarsinnaalissanersoq pillugu innuttaasunik taasititsisoqarnissaanik siunnersuut, taasititsinissarlu sioqqullugu inuit ilisimasanik tamakkiinerusunik tunngavisseqqullugit arlaannaanut attuumassuteqanngitsumik suliamillu ilisimasaqarnermik illuinnaasiunngittumillu tunngaveqartumik paasititsiniaanerit aallarteqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut Inuit Ataqtigiit ilaasortaataat)

(Siullermeenera)

Manna siunnersuut Demokraatit Inuit Ataqtigiillu assigiinnginnerannut assersuutissatsialaavoq.

Demokraatini kissaatigaarput nunarput ineriartortinneqassasoq aamma nutaanik aningaasarsiorfissatsinnik nassaassasugut atungartuussuseq tunguinerlu pillugit. Taamatut siuariartortitsisoqartarpoq.

Inuit Ataqtigiit kissaatigineruaat pissutsit taamaaginnarnissaat. Taamatut ineriartortitsisoqarlunilu siuariartortitsisoqarneq ajorpoq. Taamatut tikkuinnartitsisoqartarpoq.

Demokraatini ukiorpassuit kingulliit ingerlanerani Nunatta Kujataani ineriartorsimaneq ajuusaarutigaarput. Nunap immikkoortua qimangarneqarpoq aammali takusinnaavarput nunap immikkoortua, pitsaasunik sinaakkutissaqartinneqartuuguni eqqortumillu politikkikut aalajangiisoqartartuuppat siunissaq eqqarsaatigalugu siuariartornissaminut periarfissalissuugaluartoq. Pisariaqarporli politikerit uangut sapiissuseqarluta aalajangiisarnissarput, aamma sapiissuseqarnissarput aaliangiussatsinnik aaliangiusimasaqartarnissarput.

Misissuisaqattaaginnarsinnaanngilagut, misissueqqittoqarnissaa piumasarisaaqattaaginnarsinnaanngilarput, aamma uanitut innuttaasut taasitinneqarnissaat piumasarisinnaanngilarput, arlaannik isumaqtigiinngissuteqaraangatta. Iliuuseqartariaqarpugut, ineriartortitsiumalluta. Nuna tamaat naliginnaasumik isigalugu Nunatta Kujataa immikkut isigalugu akissaqanngilagut, Inuit Ataqtigiit utaqqisaqattaarnissaannut.



Piffissanngorpoq Inatsisartuni amerlanerussuteqarluartut Nunatta Kujataani innuttaasunut erseqqissaatigissallugu nunap immikkoortua tamanna puigorneqanngitsoq. Kujataani aatsitassarsiortoqarnissaa kissaatigaarput - Kujataata ineriartornissaa kissaatigaarput - Kujataata siuariartornissaa kissaatigaarput. Tamannalu suliaq Inuit Ataqtigiit unitsissanngilaat.

Mittarfiliortiternissaq oqaluuserigatsigu erserpoq, Inatsisartuni amerlanerussuteqartut Inuit Ataqtigiit pinnatik kissaatigaat Nunatta Kujataata ineriartortinneqarnissaa, Qaqortumi mittarfittaartoqarnissaata akuerneratigit nunap immikkoortuani inuutissarsiortut kissaateqarnerat ukiorpassuarnilu ugartuisarsimanagerat naapertorlugu.

Ullumi ulloq aallarnerfigalugu aamma ersarissarneqartariaqarpoq amerlanerussuteqartut Inuit Ataqtigiit minillugit kissaatigigaat aatsitassarsiornissaaq Nunattalu Kujataani suliffinnik pilersitsisoqassasoq, aamma nunap immikkoortua tamanna siunissami atungarissaarneruleqqullugu taqqavanilu tungiuneq aamma pitsaaneruleqqullugu.

Allatut oqaatigalugu, Demokraatini isumaqarluinnarpugut Nunatsinni aatsitassarsiornermi uranimik aatsitassallu allanik ulorianartunik qinngornertalinnik saniatigit tamakkiisumilluunniit piiasoqarsinnaalissanersoq pillugu innuttaasunik taasititsisoqassanngitsoq.

Tamatumunnga pissutaavoq kikkut tamat oqartussaaqataanerisa aqqani Inatsisartuni qinikkatut pisinnaatitaagatta innuttaasut sinnerlugit aaliangiisinaanissatsinnut. Qulequtaq manna tigussaasoq ukiorpassuarni oqallisiginikuuarput, taamaattumik naatsorsuutigaarput innuttaasut ilisimalluaraat partiit sorliit qulequttamut qanoq isumaqarnersut.

Erseqqissarusupparput Demokraatini urani atortussiatut isigigatsigu - atortussiatut naliginnaasutut. Atortussiaq uangut isumarput naapertorlugu tunisassiaavoq piassallugu naliginnaasumik soqutisariaqagarput.

Malugilaariarsiuk ileqqusussaammat tamatigit aatsitassanut inatsimmi aalajangersakkat, sillimanissaq, avatangiisit, pisuussutit atornissaat aamma inuiaqatigiinni piujuartitsinissaq eqqarsaatigalugu aallaaviujuartariaqarmat ingerlatat isumannaatsumik pisarnissaat. Allatut oqaatigalugu peqqinnissakkut isumannaatsuunissakkullu piumasaqaatit qasukkarnaviannngilagut, aamma paarlattuanik ukiut qulikkaar arlallit matuma siorna politikikkut aaliangiussimasanut naalakataarniannngilagut.

Taasisoqarsinnaanerata eqqartornerani iserfiginngitsoorsinnaanngilarput Nunatta Kujataani aatsitassaqarmat aatsitassarsiortut soqutigisaannik. Tamatta atuarnikuuarput aningaasat qanoq amerlatigisut eqqartorneqarnersut, aamma ilanngullugit suliffissat nutaat qassit pilersinneqarsinnaanersut. Taamaattumik politikeritut akisussaassusilittut soqutigisariaqarparput,



suliniutit pineqartut sapinngisamik sukkanerpaamik aallartinneqarnissaat - oqareernitsitullu piumasaqaatigalugu sillimanissaq peqqinnissaarlu eqqarsaatigaljugit aatsitassarsiornermut inatsimmi aaliangersakkat malinneqassasut.

Nunatta Kujataani najugaqartut tamaasa pillugit sinaakktissanik eqqortunik pilersitsisariaqarpugut nunap immikkoortua taqqanna ineriartorsinnaaqqullugu siuariartorsinnaaqqullugulu. Manna siunnersuut killormut sunniuteqassaaq.

Taamaattumik qulaani oqaatigisagut tunngavigalugit siunnersuutip itigartinneqarnissaa inassutigaarput.